



Gabinete Wever - Croes II

ISLAONLINE

Noticia di Gobierno

2023

Diaranson 16 Augustus 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Den conexion cu celebracion di KPA su 37 aniversario **PROME MINISTER TA FELICITA Y GRADICI CUERPO POLICIAL DI ARUBA PA SEMPER A TRAHA DEN BIENESTAR, Y PA SEGURIDAD DI PAIS ARUBA**

Awe 16 di Augustus, Korps Politie Aruba (KPA) ta celebra nan di 37 aniversario. KPA a wordo lansa na 1986, na mes momento cu Aruba a haya su Status Aparte, cu menos di 200 agente policial pa sirbi pais Aruba. Dia 16 di Augustus, 2020, Aruba a reconoce su prome scol di polis, y aki ta unda a cuminsa forma hobennan, cu tabata tin interes pa traha na bienestar y proteccion di e comunidad, pa traha como agente policial. Awe, Aruba por conta cu mas di 600 hoben masculino y femenino cu ta traha cu nan alma y curason pa bienestar y seguridad di pais Aruba.

Prome Minister Evelyn Wever-Croes ta felicita KPA cu nan aniversario, y ta gradici nan pa sirbi Aruba durante 37 aña, dignamente. E trabou di un agente policial, no ta uno facil, y ta rekeri integridad, curashi, disciplina y amor pa e prohimo. E bienestar y seguridad di nos hendenan ta importante y semper mester ta na prome luga. Hasta den situacionnan peligroso, na unda e bida di e agente por core peliger, nan compromiso pa sirbi pais Aruba, semper mester keda prioridad, y cada un di nan a sa di demostra esaki na tur momento.

Den nomber di Gobierno di Aruba y di henter e comunidad, Prome Minister ta gradici full e ekipo di KPA pa nan trabou valioso cu nan ta bin ta eherciendo. Aruba a conoce varios alto comisario y agente policial durante ultimo añanan, pero e compromiso pa sirbi y proteha nos comunidad, semper a keda demostra. "Hopi danki na cada un di boso pa tur locual boso ta haci, y sa cu boso trabou ta wordo balora y aprecia pa cada un di nos. E profesionalismo y pasion cu boso a sa di musta, ta un aspecto importante, y ta haci nos como gobernante y ciudadano di pais Aruba orguyoso di tin boso como nos protectornan. Danki di curason pa semper mantene boso mes na boso lema cu ta, "Servicio, Integridad y Seguridad". Masha Pabien na boso tur" Prome Minister a expresa.



A group of police officers in light blue uniforms and dark caps are saluting. In the background, a group of officers stands in formation. The image is part of a commemorative graphic for the 37th anniversary of the Aruban Police Corps.

2023

37 ANNIVERSARIO

DIA NACIONAL DI
Cuerpo Policial

16 | AUGUSTUS 2023

REDUCCION DEN E CIFRANAN DI CRIMINALIDAD, LO SIGUI TIN UN EFECTO POSITIVO RIBA DESAROYO DI ARUBA SU PILAR ECONOMICO, TURISMO

"Ta solamente ora bo tin amor pa bo trabou y pa bo pais,
bo ta yega na logronan beneficoso asina"

Gobierno di Aruba

Gabinete Wever Croes ||

**NOS ACTITUD POSITIVO
TA NOS FORSA PA SOLUCIONA
CADA RETO Y CREA
OPORTUNIDADNAN NOBO.**





MINISTER MADURO A HIBA PALABRA NA APERTURA DI E 'DECLARANTEN CURSUS' ORGANISA PA DEPARTAMENTO DI ADUANA Y ATIA

Un curso pa facilita e trabou di brokers y importadornan




Diamars atardi Minister di Finansa tabata presente na ATIA pa haci apertura di e 'Declaranten Cursus' organisa pa Departamento di Aduana y ATIA, pa por facilita e brokers y importadornan cu e conocimiento di e leyman, procedura y sistema di Aduana na momento di importa of exporta producto.

Esaki ta di seis biaha cu Aduana hunto cu ATIA ta organisa e curso aki pa por haya capacita y facilita comercio na Aruba. E curso ta wordo duna pa funcionarionan di Aduana y tin un duracion di 4 luna. Un total di 32 cursista a haya oportunidad pa amplia nan conocimiento y na final di e curso por conta cu nan certificado como 'Douane Declarant.' Sigur awo cu Aruba a conoce cambio fiscal manera BBO na frontera y simplificacion di tarifa di impuesto, ta importante pa brokers y importadornan por ta bon informa pa asina por traha mas eficiente y brinda un

bon servicio na e clientenan.

Minister di Finansa ta gradici director interino di Departamento di Aduana, sra. Corinne Cabenda, director di ATIA, sr. Herrick Henriquez, hoofd di e curso Declarant, sr. Marcelito Pablo y e docentenan sr. Ricardo Croes y sr. Edgar Croes pa nan aporte pa haci e curso importante aki posibel. Minister Maduro ta desea tur cursista hopi exito durante e cuater lunanan aki. "Pa sigui un curso despues di ora di trabou ta exige hopi disciplina, esfuerso y perseverancia. Mi tin sigur cu boso ta cla pa esaki y cu un actitud positivo boso lo termina e curso aki y nos lo topa bek durante e entrega di certificado na luna di december proximo. Hopi exito!", tabata palabra di e mandatario na final di su discurso pa haci apertura di e 'Declaranten Cursus' di Aduana.

Continuacion POTRETNAN DI E APERTURA DI E 'DECLARANTEN CURSUS'....





MINISTER ENDY CROES TA DESEA TUR ALUMNO Y MAESTRO UN EXITOSO AÑA ESCOLAR 2023-2024



Vakantie di scol a culmina y e alumno- y maestronan a drenta un aña escolar nobo. Minister Endy Croes ta desea tur alumno, estudiante y maestro hopi exito den aña escolar 2023-2024. Enseñansa ta hopi importante pa e desaroyo profesional y personal di nos hobennan. Enseñansa ta e yabi pa forma ciudadano competente den nos comunidad y asina hunto yuda contribui na e progreso di Aruba.

Mandatario di Enseñansa ta encurasha tur mayor pa sigui guia, motiva y inspira nan yiunan pa haci nan maximo esfuerzo na scol. Ademas di esaki, Minister Endy Croes ta desea tur maestro hopi pasenshi, amor y sabiduria pa e aña escolar nobo. Danki pa contribui den e desaroyo di Pais Aruba.

SINTONISA
CONFERENCIA DI PRENSA
DI GOBIERNO DI ARUBA

Gabinete Wever-Croes

Tur dialuna y diahuebs | 10:00 am

Minister Endy Croes:

STUDIANTENAN DI COLEGIO EPI SECTOR HORECA A HAYA UN AMPLIO PRESENTACION Y RECORIDO DI E CRUCERO CARNIVAL CELEBRATION

Diamars mainta, Minister Endy Croes hunto cu colega Minister Dangui Oduber, staf di APA, staf di Colegio EPI y 60 alumno di EPI sector Horeca a ricibi un invitacion pa bay riba e crucero di Carnival Celebration pa un presentacion sigui pa un tour di e crucero. Directora di EPI Sra. Ankie Danker y staf a acompaña e alumnonan. Carnival Cruise Lines tin diferente crucero, pero e Carnival Celebration ta “top of the line”. Carnival Celebration ta un barco crucero luhoso cu a drenta den servicio na aña 2022.

Durante e mainta informativo, e studiantenan a ricibi un presentacion amplio di Carnival Cruise Lines, trabounan cu e crucero ta ofrece y a haya un bista di tur e servicionan Carnival Celebration ta brinda na su clientenan. E meta ta pa inspira y motiva e alumnonan di EPI pa nan sigui studia, explora conocimiento y kisas den futuro nan por traha riba e crucero aki. Na e momento aki tin 6000 turista riba e mega crucero di Carnival Celebration y 1748 trahado.

Pa conclui, Minister Endy Croes ta gradici Carnival Cruise Lines, APA, Minister Dangui Oduber y Colegio EPI pa brinda e oportunidad unico aki na e studiantenan. Alabes, Minister Endy Croes ta gradici Carnival Celebration pa nan excelente trato y servicio. Minister Endy Croes a indica cu lo haci e peticion pa ripiti esaki kisas dos (2) biaha den un (1) aña pa asina keda inspira y motiva nos hobennan.



Departamento di Aduana: APERTURA DI E DECLARANTEN CURSUS PA DOUANE BROKERS Y IMPORTADORNAN



Diamars ultimo 15 augustus 2023 a tuma luga e apertura di e Declaranten Kursus. Departamento di Aduana hunto cu e asistencia y facilitacion di Aruba Trade & Industry Association (ATIA), ta duna e curso aki na 32 persona cu ta haci trabounan/proceduranan aduanal di declaracion di documento na momento cu mercancia drenta y sali for di Aruba.

Den presencia di Minister di Finansa y Cultura, sra. Xiomara Maduro, director interino di Departamento di Aduana, sra. Corinne Cabenda, director ATIA, sr. Herrick Henriquez, y hoofd di e curso Declarant, sr. Marcelito Pablo y docentenan, a duna palabra di bon bini na e cursistanan y un splicacion general di e contenido di e curso aki. Esaki ta e di seis curso cu ta ser organiza. E meta di e curso ta pa brokers y importadornan por haci e trabou di declaracion, como tambe cumpli cu tur formalidad di Aduana, na un manera mas efectivo y eficiente. Na su turno, esaki ta facilita comercio grandemente. E curso aki tin hopi beneficio mirando cu brokers y importadornan ta haya mas conocimiento den e parti legislativo di Aduana



manera e Ordenansa Nacional In,- Uit,- en Doorvoer, mas conocimiento di e tarief di invoerrechten, douanewaarde, e sistema di Asycuda, y mas procedura di Aduana.

Departamento di Aduana y ATIA ta desea e cursistanan hopi exito.



INFORMA BOMES TOCANTE BBO NA FRONTERA

Bo ta importa producto?

- Kico ta BBO na frontera?
- Na ki momento mester paga esaki?
- Ken mester paga BBO na frontera?
- Kico ta productonan comercial?
- Con ta haci declaracion di BBO?
- Con ta calcula e deducccion di BBO paga na frontera?
- Por haya restitucion di BBO paga na frontera?

Bishita www.impuesto.aw y ricibi contesta riba e preguntanan aki.
Consulta tambe e seccion di preguntanan frecuente pa informacion riba situacionnan specifico.

Sigui nos pagina di Facebook **Departamento di Impuesto** of bishita
www.impuesto.aw of yama nos na **522 7423** of **522 7424** of
Whatsapp na **592 8200**



Desaroyo y progreso di un pais ta mas
sostinibel, fuerte y lihe ora cu cada
ciudadano di e pais uni den esfuersonan
y contribui cu positivismo na e vision
pa logra cosnan grandi pa futuro.

2023 AÑA DI UNION Y POSITIVISMO! _____